

梁公曲尺誌公剪刀

○問一切諸佛法皆從此經出如何是此經師
曰常轉曰未審經中說什麼師曰有疑請問
○問如何是和尚家風師曰
錦帳銀香囊風吹滿路香

○有僧寫師真呈師問曰還似我也無僧無對
師自代曰衆僧看取

○一日僧入浴院見僧踏水輪僧見師乃下不
審師曰幸自碌碌地轉何須却恁麼僧曰不

恁麼又爭得師曰若恁麼欽山眼堪作什麼
也僧云作麼生是師眼師乃以手作撥眉勢
僧曰和尚又得恁麼師曰是是為我恁麼便
不得恁麼僧無對師曰索戰無功一場氣悶
良久乃問僧云會麼僧云不會師曰欽山為
汝擔一半

○師與雪峯巖頭因過江西到一茶店內喫茶
次師曰不會轉身通氣者今日不得茶喫巖
頭云若恁麼我定不得茶喫也雪峯云某甲

亦然師曰兩箇老漢俱不識語在巖頭云什
麼處去也師曰布袋裏老鷄雖活如死巖頭
云退後着退後着師曰豁兄且置存公作麼
生靈峯以手畫箇圓相師曰不得不問巖頭
呵呵云太遠生師曰有口不得喫茶人多巖
頭靈峯俱無語

○有良禪客叅次纔禮拜後便問云一箭射三
關時如何師曰放出關中主看良曰恁麼即
知過必改去也師云更待何時良云好隻箭

放不着所在便出去師曰擬射三關且從試
為欽山發箭良近前良久而退師乃打良七
拄杖良乃出去師曰且聽箇亂統漢心內疑
三十年有人舉似同安和尚安云良公雖發
箭要且未中的其僧便問同安云未審如何
得中的去安云關中主是什麼人其僧却回
舉向師師曰良公若解恁麼也免得欽山口
也然雖如此同安不是好心亦須看始得
○僧叅師豎起拳頭云若開成掌即五指參差

如今為奉必無高下汝道欽山通商量不通
商量其僧近前却豎拳而已師曰便恁麼只
是箇無開合漢僧云未審和尚如何接人師
曰我若接人共汝一般去也僧云特來於師
也須吐露宗風師曰汝若特來我須吐露僧
云便請師乃打之其僧無語師曰守株待兔
枉用心神

前巖頭全豁禪師法嗣

行思禪師第六世

台州瑞巖師彥禪師

閩越人也姓許氏自幼披緇秉戒無缺初禮
巖頭致問曰如何是本常理巖曰動也曰動
時如何巖曰不是本常理師沈思良久巖曰
肯即未脫根塵不肯即永沈生死師遂領悟
身心皎如巖頻召與語徵酌無惑

○復謁夾山會和尚會問什麼處來曰卧龍來
會曰來時龍還起未師乃顧視之會曰灸瘡
上更着艾焦曰和尚又苦如此作什麼會休
○尋抵丹丘終日如愚四眾欽慕請住瑞巖統

衆嚴整江表稱之

○僧問頭上雲蓋現足下雲生時如何師曰披枷帶鎖漢曰頭上無寶蓋足下無雲生時如何師曰猶有扭在曰畢竟如何師曰齋後困○鏡清問天不能覆地不能載豈不是師曰若是即被覆載清曰若不是瑞巖幾遭也師自稱曰師彥

○問如何是佛師曰石牛曰如何是法師曰石牛兒曰恁麼即不同也師曰合不得曰為什

麼合不得師曰無同可同合什麼

○問作麼生商量即得不落塔級師曰排不出曰為什麼排不出師曰他從前無塔級曰未審居何位次師曰不坐普化殿曰還理化也無師曰名聞三界重何處不歸朝

○一日有村媪來作禮師曰汝疾歸去救取數千物命媪恣忙至舍乃見兒婦持竹器拾田螺歸媪接收放諸水濱師之異迹頗多

懷州玄泉彥禪師

僧問如何是道中人師曰日落投孤店

○問如何是佛師曰張家三箇兒曰學人不會師曰孟仲季便不會

○問如何是聲前一句師曰呬曰轉後如何師曰是什麼

吉州靈巖惠宗禪師

福州長溪人也姓陳氏受業於龜山

○僧問如何是靈巖境師曰松檜森森密密遮曰如何是境中人師曰夜夜有猿啼

○問如何是學人自己本分事師曰

拋却真金作瓦礫作麼師後住禾山而終

福州羅山道閑禪師

郡之長溪人也姓陳氏出家於龜山年滿受具遍歷諸方

○嘗謁石霜問去住不寧時如何霜曰直須盡却師不愜意

○乃參巖頭問前語巖曰從他去住管他作麼師於是服膺

尋遊清涼山闍帥飲其法味請居羅山號法寶大師

○初上堂日方升坐歛衣乃曰珍重少須又曰未識底近前來時有僧出禮拜師抗聲曰也大苦僧起擬伸問師乃喝出

○問如何是奇特一句師曰道什麼

○問佛放眉間白毫光照萬八千世界如何是光師曰高聲道僧曰照何世界師乃喝出

○問急急相投請師一接師曰會麼曰不會師

曰箭過也

○問九女不携誰是哀提者師曰高聲問僧擬再問師曰什麼處去也

○問如何是宗門流布師展足示之

○問當鋒事如何辨明師舉如意僧曰乞和尚垂慈師曰大遠也

○問如何是最妙一句師曰披露識麼僧擬進語師曰話墮也

○定慧上坐參師問什麼處來曰遠離西蜀近

發開元又進前問即今作麼生師曰喫茶去
慧猶未退師曰秋霜稍暖去慧出法堂外歎
曰今日擬打羅山寨弓折箭盡也休休乃下
參衆

○明日師上堂慧出問豁開戶牖當軒者誰師
乃喝慧無語師曰毛羽未備且去

○僧舉寒山詩問師曰百鳥銜苦華時如何師
曰貞女室中吟曰千里作一息時如何師曰
送客遊庭外曰欲徃蓬萊山時如何師曰歎

枕觀彌猴曰將此充糧食時如何師曰古劍
鬪髅前

○問如何是百草頭上盡是祖師意師曰刺破
汝眼

○問聲前古堯爛意作麼生師曰倚著壁
問前是萬丈洪崖後是虎狼師子正當恁麼
時如何師曰自在

○問三界誰為主師曰還解喫餅麼

○師臨遷化上堂集衆良久展左手主事圍測

乃令東邊師僧退後又展右手又令西邊師僧退後師謂衆曰欲報佛恩無過流通大教歸去也歸去也珍重言訖莞爾而寂

福州香豁從範禪師

僧到叅師曰汝豈不是鼓山僧對曰是師曰額上珠為何不見無對僧辭師門送召曰上座僧迴首師曰滿肚是禪曰和尚是什麼心行師大笑而已

○師因僧披衲衣示偈曰

迦葉上名衣披來須捷機纔分招的箭密露不藏龜

福州羅源聖壽嚴和尚

有僧自泉州迴來叅師補衲次提起示之曰山僧一衲衣展似衆人見雲水請兩條莫教露針線快道僧無對師曰如許多時在彼作什麼

前洪州感潭資國和尚法嗣

安州白兆山竺乾院志圖號顯教大師

僧問諸佛心印什麼人傳得師曰達磨大師
曰達磨爭能傳得師曰汝道什麼人傳得

○問如何是直截一路師曰截

問如何是佛法大意師曰苦

○問如何是道師曰普

○問如何是學人自己師曰失

○問如何是無山河大地去師曰不起見

○問如何是佛師曰丙丁童子來求火此一問
是僧玄則問玄則後叅法眼方明厥旨住金

陵報恩院

○問如何是畢鉢羅窟迦葉道場中人師曰釋
迦牟尼佛

○問如何是朱頂王菩薩師曰

問那箇赤頭漢作麼

前濠州思明和尚法嗣

襄州鷲嶺善本禪師

因入浴室有僧問和尚是離垢底人為什麼
却浴師曰定水湛然滿浴此無垢人

○問祖意教意是同是別師曰

鷲嶺峰上青草森天鹿野苑中狐兔交橫

前潭州大光山居誨禪師法嗣

潭州谷山有緣禪師

僧問伶俐之子如何歸向師曰會人路不通
曰恁麼即無奉重處也師曰我道你鉢盂落地拈不起

○問一撥便轉時如何師曰

野馬走時鞭響斷石人撫掌笑呵呵

潭州龍興和尚

僧問一撥便轉時如何師曰根不利

○問得座披衣時如何師曰不端嚴曰為什麼不端嚴師曰不從証得

○問如何是道中人師曰終日寂攢眉

潭州伏龍山和尚 第一世住

僧問攪長河為酥酪變大地為黃金時如何
師曰臂長衫袖短

○問隨緣認果如何是果師曰雪內牡丹花

○問如何是祖師西來意師曰
你得恁麼不識痛痒

京兆白雲善藏禪師

僧問如何深深處師曰矮子渡深谿

○問赤脚時如何師曰何不脫却

○問如何是法法不生師曰萬水千山

潭州伏龍山和尚 第二世住

僧問隨緣認得時如何師曰

汝道興國門樓高多少

問子不談父時如何師曰低聲低聲
陝府龍峻山和尚

僧問如何是龍峻山師曰佛眼看不見曰如
何是山中人師曰作麼

○問如何是不知善惡底人師曰千聖近不得
曰此人還知有向上事也無師曰不知曰為
什麼不知師曰不識善惡說什麼向上事曰
如何師曰不見道行俗 上干下欲

○問如何是佛向上人師曰不戴容

○問凡有展拓盡落今時不展拓時如何師曰
不展不展曰畢竟如何師曰不拓不拓

潭州伏龍山和尚 第三世住

問行盡千山路玄機事若何師曰

鳥道不曾接

前筠州九峯道虔禪師法嗣

新羅清院和尚

問奔馬爭毬誰是得者師曰誰是不得者曰
恁麼即不爭是也師曰直得不爭亦有過在

曰如何免得此過師曰要且不曾失曰不失
處如何鍛鍊師曰兩手捧不起

洪州泐潭寶峰神黨禪師

僧問四威儀中如何辨主師曰

正遇寶峯不脫鞋

○問如何是佛法大意師曰

虛空駕鐵船岳頂浪滔天

吉州南源山行修號慧觀禪師亦云光睦和尚
僧問如何是南源境致師曰

幾處峯峦猿鳥嘯一帶平川遊子迷

○問如何是南源深深處師曰衆人皆見曰恁麼即淺去也師曰也是兩頭遠

洪州泐潭明禪師

一日下到客位衆請師歸方丈師曰道得即去時牟和尚對曰大衆請師乃上法堂

問非思量處識情難測時如何師曰我不欲違古人曰不違古人意作麼生師曰也合消得禮三拜

○僧問碓搗磨磨不得忘却此意如何師曰虎口裏活雀兒

○問如何是道者師曰毛毯毯曰如何是道者家風師曰佛殿前逢尊者

○問如何是和尚終日事師曰鉢盂裏無折筯曰如何是沙門終日事師曰轟轟不借萬人吉州秋山和尚

僧問如何是祖師西來意師曰杉樹子
洪州泐潭延茂禪師

僧問如何是古佛心師曰
終不道土木瓦礫是

○問日落西山去林中事若何師曰
庭前紅華秀室內不知春

洪州鳳棲山同安院常察禪師

僧問如何是鳳棲家風師曰鳳棲無家風曰
既是鳳棲為什麼無家風師曰不迎賓不待
客曰恁麼即四海叅尋當為何事師曰盤釘
自有旁水施

○問如何是鳳棲境師曰

千峯連岳秀萬嶂不知春

曰如何是境中人師曰

孤巖倚石坐不下白雲心

洪州泐潭匡悟禪師 第四世住

僧問如何是直截一路師曰恰好消息曰還
通向上事也無師曰魚從下過

○問如何是閉門造車師曰活計一物無曰如
何是出門合轍師曰坐地進長安

○問香煙馥郁大張法筵從上宗乘如何舉唱
師曰莫錯舉似人曰恁麼即總應如是師曰
還是沒交涉

○問六葉芬芳師傳何葉師曰

六葉不相續花開果不成曰豈無今日事師
曰若是今日即有曰今日事如何師曰

葉葉連枝秀華開處處芳

吉州禾山無殷禪師

福州人也姓吳氏七歲依雪峯真覺大師出

家年滿受戒遊方抵筠陽謁九峯

峯許入室一日謂之曰汝遠遠而來暉暉哀
隨衆見何境界而可修行由何徑路而能出
離師對曰重昏廓闢盲者自盲峯初未許師
於是發明厥旨頓忘知

先受請上吉州禾山大智院學徒濟濟

嘗述垂誡十篇諸方歎伏咸謂禾山可以為
叢林表則

時江南李氏召而問曰和尚何處來師曰禾

山來曰山在什麼處師曰人來朝鳳闕山岳
不曾移國主重之命居揚州祥光院復乞入
山以翠巖院乃江西之勝槩遂棲心焉

時上藍院復虛其室命師來往闡化號澄源
禪師

○僧問學人乍入叢林乞師指示師曰
於汝不惜

○問仰山插鋏意作麼生師曰汝問我曰玄沙
踏倒鋏意作麼生師曰我問汝

○問未辨真宗如何體悉師曰頭大尾尖

○問咫尺之問為什麼不覩師顏師曰且與闍
梨道一半曰為什麼不全道師曰畫法無民
曰不怕無民請師畫法師曰為知己喪身曰
為什麼却喪身師曰好心無好報

○問尊者撥眉擊目視育王時如何師曰即今
也恁麼曰學人如何領會師曰摩利支山

○問摩尼寶殿有四角一角常露如何是露底
角師舉手曰汝打我却問汝還會麼曰不會

師曰汝爭解打得我

○問如何是西來意師曰撲破著

○問已在紅焰請師烹鍊師曰槌下成器曰恁麼即烹鍊去也師曰池州和尚

○問四壁打禾中行剗草和尚赴阿那頭師曰什麼處不赴曰恁麼即同於衆去也師曰小師弟子

○師建隆元年庚申歲二月示有微疾三月二日令侍者啓方丈集大衆告辭曰後來學者

未識禾山即今識取珍重先是大衆為立生藏本國謹法性禪師塔曰妙相

洪州泐潭年和尚

問如何是學人着力處師曰正是着力

○問古人卷席意如何師曰珍重便下堂前台州涌泉景欣禪師法嗣

台州六通院紹禪師

初叅涌泉和尚入室領旨

○一日燒會歸院泉問去甚處來師曰燒會來

泉曰火後事作麼生紹曰鐵蛇鑽不入泉許
之後居六通院玄侶依附

○僧問不出咽喉唇吻事如何師曰待汝一鑿
斲斷巾子山我亦不向汝道

問南山有一毒龍如何近得師曰非但闍梨
千聖亦近不得

○人問承聞南方有一劍話如何是一劍師曰
不當鋒曰頭落又作麼生師曰我道不當鋒
有什麼頭其人禮謝而去

○師休夏入天台山華頂峯晦迹莫知所終
前潭州雲蓋山志元禪師法嗣

潭州雲蓋山志罕禪師

僧問如何是岳頂浪滔天師曰文殊正作闍
曰正作闍時如何師曰不向機前展大悲

新羅卧龍和尚

問如何是大人相師曰紫羅帳裏不垂手曰
為什麼不垂手師曰不尊貴

○問十二時中如何用心師曰胡孫喫毛虫

彭州天台和尚先住天台

問古佛向什麼處去師曰

中央甲第高歲歲出靈苗

○問古鏡未磨時如何師曰不施功曰磨後如何師曰不照燭

前潭州谷山巖禪師法嗣

新羅瑞巖和尚

問黑白兩亡開佛眼時如何師曰恐你守肉
○問如何是誕生王子師曰深宮引不出

新羅泊巖和尚

問如何是禪師曰古塚不為家

○問如何是道師曰徒勞車馬跡

○問如何是教師曰貝葉收不盡

新羅大嶺和尚

僧問只到潼關便却休時如何師曰只是途

中活計曰其中活計如何師曰體即得當即

不得曰體得為什麼當不得師曰體是什麼

人分上事曰其中事如何師曰不作尊貴

前潭州中雲蓋和尚法嗣

潭州雲蓋山景和尚號證覺禪師

僧問國土晏清功歸何處師曰銀臺門下不
賀曰轉為無功時如何師曰王家事可然

萬僧問答景德傳燈全錄卷之十七



萬僧問答景德傳燈全錄卷之十八

古汴道原太師纂集


新安朝用汪士賢校

前福州雪峯義存禪師法嗣

福州玄沙宗一大師

法名師備福州閩縣人也姓謝氏幼好垂釣
泛小艇於南臺江狎諸漁者

唐咸通初年甫三十忽慕出塵乃棄釣舟投
芙蓉山靈訓禪師落髮往豫章開元寺道玄



律師受具布納芒履食才接氣常終日宴坐
衆皆異之與

雪峯義存本法門昆仲而親近若師資雪峰
以其苦行呼為頭陀

○一日雪峯問曰阿那箇是備頭陀對曰終不
敢誑於人

○異日雪峯召曰備頭陀何不徧參去師曰達
磨不來東土二祖不往西天雪峯然之

○暨登象骨山乃與師同力締構玄徒臻萃師

入室咨決因替晨昏又閱楞嚴經發明心地
由是應機敏捷與修多羅冥契諸方玄學有
劑所悟亦莫能觀汝還識大悟麼不可是汝
向髑髏前認他鑒照不可是汝說空說無說
這邊那邊有世間法有一箇不是世間法和
尚子虛空猶從迷妄幻生如今若是大肯去
何處有這箇稱說尚無虛空消息何處有三
界業次父母緣生與汝椿立前後如今道無
尚是誑語况是有知麼是汝多時行脚和尚

子稱道有覺悟底事我今問汝只如巖山巖
崖迥絕人處還有佛法麼還裁辯得麼若辯
不得卒未在我尋常道亡僧面前正是觸日
菩提萬里神光頂後相若人覲得不妨出得
陰界脫汝髑髏前意想都來只是汝真實人
體何處更別有一法解蓋覆汝知麼還信得
麼解承當得麼大須努力

○師又云我今問汝諸人且承當得箇什麼事
在何世界安身立命還辯得麼若辯不得恰

似捏目生花見事便差知麼如今現前見有
山河大地色空明暗種種諸物皆是狂勞花
相喚作顛倒知見夫出家人識心達本故號
沙門汝今既已剃髮披衣為沙門相即合有
自利利他分如今看著盡黑漫漫地如黑汁
相似自救尚不得爭解為得他人仁者佛法
所未決必從之請益至若與雪峯和尚徵詰
亦當仁不讓雪峯曰備頭陀其再來人也

○一日雪峯上堂曰要會此事猶如古鏡當臺

胡來胡現漢來漢現師曰忽遇明鏡來時如
何峯曰胡漢俱隱師曰老和尚脚根猶未點
地在

○師上堂時久大衆盡謂不說法一時各歸師
乃呵云者總是一樣底無一箇有智慧但見
我開這兩邊皮盡來簇着覓言語意度是我
五實為他却總不知着恁麼大難大難

○師有時云諸禪德汝諸人盡巡方行脚來稱
我叅禪學道為有奇特去處為當只恁麼東

問西問若有試通來我為汝證明是非我盡
識得還有麼若無當知只是趁讚古困切是

汝既到這裏來我今問汝汝諸人還有眼麼
若有即今便合識得還識得麼若不識便被
我喚作生盲生聾底人還是麼肯恁麼道麼
禪德亦莫自屈是汝真實何曾是恁麼人十
方諸佛把汝向頂上着不敢錯誤著一分子
只道此事唯我能知會麼如今相紹盡道承
他釋迦我道釋迦與我同叅汝道叅阿誰會

磨大不容易知莫非大悟始解得知若是限
因緣事大莫作等閑相聚頭亂說雜話趁讀
過時光陰難得可惜許大丈夫兒何不自省
察看是什麼事只如從上宗風是諸佛頂族
汝既承當不得所以我方便勸汝但從迦葉
門接續頓超去此一門超汝凡聖因果超他
毘盧妙莊嚴世界他釋迦方便門直下永劫
不教有一物與汝作眼見何不急急究取未
必道我且待三生兩生又積淨業仁者汝宗

乘是什麼事不可由汝身心用工莊嚴便得
去不可他心宿命便得去會麼只如釋迦出
頭來作許多變弄說十二分教如瓶灌水大
作一場佛事向汝此門中用一點不得用一
毛頭伎倆不得知麼如同夢事亦如寐語沙
門不應得出頭來蓋為識得知麼識得即是
大出晚大出頭所以道超凡越聖出生離死
離因離果超毘盧越釋迦不被凡聖因果所
謾一切處無人識得汝知麼莫只長戀生死

愛網被善惡拘將去無自由分饒汝鍊得身心同空去饒汝得到精明湛不搖處不出他識陰古人喚作如急流水流急不覺妄為清淨恁麼修行盡不出他輪迴際依前被輪轉去所以道諸行無常直是三乘功果如是可畏若无道眼亦不為究竟何如從今日博地凡夫不用一毫功夫便頓超去解省心力麼還願樂麼勸汝如今立地待汝觀去不用汝加功練行如今不恁麼更待何時還肯麼

還肯麼

○師有時上堂謂衆曰是汝真實如是

○又有時云達磨如今現在汝諸人還見麼

○師又云是諸人見有險惡見有大蟲刀劍諸事逼汝身命便生无限怕怖如似什麼恰似世間畫師一般自畫作地獄變相作大蟲刀劍了好好地看了却自生怕怖汝今諸人亦復如是百般見有是汝自幻出自生怕怖亦不是別人與汝為過汝今欲覺此幻惑麼但

識取汝金剛眼睛若識得不曾教汝有纖塵
可得露現何處更有虎狼刀劍解憎嚇得汝
直至釋迦如是伎倆亦覓出頭處不得所以
我向汝道沙門眼把定世界函蓋乾坤不漏
絲髮何處更有一物為汝知見知麼如是出
脫如是奇特何不究此

○師云汝諸人如在大海裏坐沒頭水浸却了
更展手問人乞水喫還會麼

○夫學般若菩薩是大根器有大智慧始得若
有智慧即今便得出脫若是根機遲鈍直須
勤苦志耐日夜忘疲失食如喪考妣相似恁
急切盡一生去更得人荷揆尅骨究竟不妨
亦得覲去且况如今誰是堪任受學底人仁
者莫只是記言記語恰似念陀羅尼相似踏
步向前來口裏哆哆和啞地被他把住詰問
著沒去處便嗔道和尚不為多答話恁麼學
事大苦知麼

○有一般坐繩床和尚稱為善知識問著便動

身動手點眼吐舌瞪視

○更有一般便說昭昭靈靈靈臺智性能見能聞向五蘊身田裏作主宰恁麼為善知識大賺人知麼我今問汝汝若昭昭靈靈是汝真實為什麼瞌睡時又不成昭昭靈靈若瞌睡時不是為什麼有昭昭時汝還會麼這箇喚作認賊為子是生死根本妄想緣氣汝欲識此根由麼我向汝道昭昭靈靈只因前塵色聲香等法而有分別便道此是昭昭靈靈若

無前塵汝此昭昭靈靈同於龜毛兔角仁者真實在什麼處汝今欲得出他五蘊身田主宰但識取汝秘密金剛體

○古人向汝道圓成正遍遍周沙界我今少分為汝智者可以譬喻得解汝見此南閩浮提日麼世間人所作興營養身活命種種心行作業莫非承它日光成立只如日體還有多般及心行麼還有不周遍處麼欲識此金剛體亦如是

且如今山河大地十方國土色空明暗及汝身心莫非盡承汝圓成威光所現直是天人羣生類所作業次受生果報有性無情莫非承汝威光乃至諸佛成道成果接物利生莫非承汝威光只如金剛體

還有凡夫諸佛麼有汝心行麼不可道無便得當去也知麼汝既有如是奇特當陽出身處何不發明取便隨他向五蘊身田中鬼趣裏作活計直下自謾却去忽然無常殺竟

來眼目講張身見命見恁麼時大難枝荷如生脫龜筒相似大苦

仁者莫把瞌睡見解便當却去未解蓋覆得毛頭許汝還知麼

三界無安猶如火宅且汝未是得安樂底人只大作群隊干他人世這邊那邊飛走野鹿相似但知求食為衣若恁麼爭行他王道知麼國王大臣不拘汝父母放汝出家十方施主供汝衣食土地龍神護汝也須具慚愧知

恩始得莫辜負人好長連牀上排行著地銷
將去道是安樂未在皆是粥飯將養得汝爛
冬瓜相似變將去土裏埋將去業識茫茫無
本可據沙門因什麼到恁麼地

只如大地上蠢蠢者我喚作地獄劫住如今
若不了明朝後日看看變入驢胎馬肚裏牽
犁洩杷銜鐵負鞍碓搗磨磨水火裏燒煮去
大不容易受大恐懼好是汝自累知麼若是
了去直下永劫不曾教汝有這箇消息若不

了煩惱惡業因緣未是一劫兩劫得休直與
汝金剛齊壽知麼

○南際長老到雪峯雪峯令訪于師師問曰古
人道此事唯我能知長老作麼生南際曰須
知有不求知者歸宗柔別拈掌三下師曰山
頭和尚喫許多辛苦作麼

○雪峯因普請會田見一蛇以杖挑起召衆曰
看看以刀芟為兩段師以杖拋於背後更不
顧視衆愕然雪峯曰俊哉

○師一日隨侍雪峯遊山雪峯指一片地曰此處造得一所無縫塔師曰高多少雪峯乃顧視上下師曰入天依報即不如和尚若是靈山受記大遠在

○雪峯曰世界濶一尺古鏡濶一尺世界濶一丈古鏡濶一丈師指火爐曰火爐濶多少雪峯曰如古鏡濶師曰老和尚脚跟未點地
○師初受請住梅谿場普應院中間遷止玄沙山自是天下叢林海衆皆望風而賓之

閩帥請演無上乘待以師事學徒餘八百室戶不閉

師上堂良久謂衆曰我為汝得徹困也會麼僧問寂寂無言時如何師曰寤語作麼曰本分事請師道師曰瞌睡作麼曰學人即瞌睡和尚如何師曰爭得恁麼不識痛痒又曰可惜許大師僧千道萬里行脚到這裏不消箇瞌睡寤語便屈却去

○問如何是學人自己師曰用自己作麼

○僧問從上宗門中事師此間如何言論師曰
少人聽僧曰請和尚直道師曰愚聾作麼又
曰仁者如今事不獲已教我抑下如是威光
苦口相勸百千方便道如此如彼共汝相知
聞盡成顛倒知見將此咽喉唇吻只成得箇
野狐精業謾汝我還肯麼只如有過無過唯
我自知汝爭得會若是恁麼人出頭來甘伏
呵責

夫為人師匠大不容易須是善知識始得知
我如今恁麼方便助汝猶尚不能覲得可中
純舉宗乘是汝向什麼處安措還會麼四十
九年是方便只如靈山會上有百萬衆唯有
迦葉一人親聞餘盡不聞汝道迦葉親聞底
事作麼生不可道如來無說說迦葉不聞聞
便得當去不可是汝修因成果福智莊嚴底
事知麼

且如道吾有正法眼付囑大迦葉我道猶如
話月曹谿豎拂子還如指月所以道大唐國

內宗乘中事未曾見有一人舉唱盡大地人
失却性命如無孔鐵樵相似一時亡鋒結舌
去汝諸人賴遇我不惜身命共汝顛倒知見
隨汝任意方有申問處我若不共汝恁麼知
聞去汝向什麼處得見我會麼大難努力珍
重乃有偈曰

萬里神光頂後相沒頂之時何處望

事亦成意亦休此箇元來觸處周智者捲著
便提取莫待須臾失却頭

又偈曰

玄沙遊徑別 時人切須知 三冬陽氣盛

六月降霜時 有語非關舌 無言切要詞

會我最後句 出世少人知

○問四威儀外如何秦王師曰汝是王法罪人
爭會問事

○問拈槌豎拂還當宗乘中事也無師曰不當
曰古人意作麼生師舉拂子僧曰宗乘中事
如何師曰待汝悟始得

○問如何是金剛力士師乃吹之

○文桶頭下山師問桶頭下山幾時歸曰三五日師曰歸時有無底桶子將一擔歸文無對歸宗柔代云和尚用作什麼

○師有時垂語曰諸方老宿盡道接物利生且問汝只如音聾啞三種病人汝作麼生接若拈槌豎拂他眼且不見共他說話他又不開口又啞若接不得佛法盡無靈驗時有僧出曰三種病人和尚還許人商量否師曰許汝

作麼生商是其僧珍重出師曰不是不是法眼云我當時見羅漢和尚舉此僧語我便會

三種病人雲居錫云只如此僧會不會若道會玄沙又道不是若道不會法眼為什麼道

我因此僧語便會三種病人上座无事上來商量大家要知羅漢云桂琛見有眼耳和尚作麼生接中塔云三種病人即今在什麼處又一僧云非唯謾他兼亦自謾

○長慶稜來師問除却藥忌作麼生道稜曰慙

作麼師曰雪峯山椽子拾食來這裏却雀兒
放糞

○師見僧來禮拜乃曰禮拜者因我得禮拜汝

○一日普請往海坑斫柴見一虎僧曰和尚虎

師曰是汝虎歸院後僧問適來見虎云是汝

未審尊意如何師曰娑婆世事有四重障若

人透得許汝出陰界東禪齊云上座古人見

了道我身心如大地虛空如今人還透得麼

○師問長生然和尚維那觀佛前際不來後際

不去合則無住汝作麼生觀對曰放皎然過

有商量師曰放汝過作麼生長生良久師曰

教阿誰委曰徒勞側耳師曰情知汝向山鬼

窟裏作活計崇壽稠別長生云喫什麼作如

○僧問師學人為什麼道不得師曰畱塞汝口

爭解道得法眼云古人恁麼道甚奇特且問

上座口是什麼

○問凡有言句盡落棧積不落棧積請和尚商

量師曰拗折秤衡來與汝商量

○問古人瞬視接人和尚如何接人師曰我不瞬視接人

○僧問是什麼得恁麼難見師曰只為太近法眼云也無可得近直下是上座

○師在雪峯時光侍者謂師曰師叔若學得禪某甲打鐵船下海去師住後問曰光侍者打得鐵船也未光無對法眼代云和尚終不恁麼法燈代云請和尚下船玄覺代云貧人思舊債

○師一日遣僧送書上雪峯和尚雪峯開紙唯白紙三幅問僧會麼曰不會峯曰不見道君子千里同風其僧迴舉似於師師曰這老和尚蹉過也不知東禪齊云什麼處蹉過若的蹉過師豈不知弟子意若不恁麼會只如玄沙意作麼生若會便參取玄沙

○師問鏡清教中道菩薩摩訶薩不見一法為大過失且道不見什麼法鏡清指露柱云莫是不見這箇法麼同安顯別云也知和尚不

道次師曰浙中清水白米從汝喫佛法未會
在玄覺云且道玄沙恁麼道意在什麼處不
見僧問洞山云不見一法為大過失此意如
何洞山云不見一法好言語上座一宿覺云
不見一法即如來方得名為觀自在普賢菩
薩又云不見一法為大過失是一箇是兩箇
試斷者

○僧問承和尚有言盡十方世界是一顆明珠
學人如何得會師曰盡十方世界是一顆明

珠用會作麼

師來日却問其僧盡十方世界是一顆明珠
汝作麼生會對曰盡十方世界是一顆明珠
用會作麼師曰知汝向山鬼窟裏作活計玄
覺云一般恁麼道為什麼却成山鬼窟去

○問如何是無縫塔師曰這一縫大小玄覺云
叢林中道恁麼來何處得無縫還會得著麼

○韋監軍來謁舉曹山和尚甚奇恠師乃問撫
州取曹山多少韋指傍僧云上座曾到曹山

否曰曾到韋曰撫州取曹山多少曰一百二十韋曰恁麼即上座不到曹山韋却起禮拜師師曰監軍却須禮此僧此僧却具慙愧雲若錫云什麼處是此僧具慙愧若檢得出許上座有行脚眼

○西天有聲明三藏到閩師令與師相見師以火筋敲銅爐問是什麼聲三藏對曰銅鐵聲法眼別云請大師為大王法燈別云聽和尚問師曰大王莫受外國人謾三藏無對法眼

代云大師久受大王供養法燈代云却是大尚謾大王

○師南游莆田縣排百戲迎接來日師問小塘長老昨日許多喧鬧向什麼處去也小塘提起衲衣角師曰料掉勿交涉法眼別云昨日有多少喧鬧法燈別云今日更好笑

師問僧乾闥婆城汝作麼生會僧曰如夢如幻法眼別物示之

○師與地藏琛在方丈內說話夜深侍者閉却

門師曰門總閉了汝作麼生得出去琛曰喚什麼作門法燈別云和尚莫欲歇去

○師一日以杖拄地問長生曰僧見俗見男見女見汝作麼生見長生曰和尚還見皎然見處麼師曰相識滿天下

○問承和尚有言聞性徧周法界雪峰打鼓這裏為什麼不聞師曰誰知不聞

○問險惡道中以為津梁師曰以汝眼為津梁曰未得者如何師曰快救取

○師與韋監軍喫果子韋問如何是日用而不知師拈起果子曰喫韋喫果子了再問之師曰只守是日用而不知

○普請般柴師曰汝諸人盡承吾力一僧曰既承師力何用普請師叱之曰不普請爭得柴

○師問明真太師善財參彌勒彌勒指歸文殊文殊指歸佛處汝道佛指歸什麼處對曰不知師曰情知汝不知法眼別云喚什麼作佛

○大普玄通到禮覲師謂曰汝在彼住莫誑惑

人家男女對曰玄通只是開箇供養門晚來朝去爭敢作恁麼事師曰事難曰其情是難師曰什麼處是難處曰為伊不肯承當師便入方丈柱却門

○問學人乍入叢林乞師指箇入路師曰還聞堰溪水聲否曰聞師曰是汝入處

○泉守王公請師登樓先語客司曰待我引大師至樓前便昇却梯客司稟旨公曰請大師登樓師視樓復視其人乃曰佛法不是此道

理法眼云未昇梯時一日幾度登樓

○師與泉守在室中說話有一沙彌揭簾入見却退步而出師曰那沙彌好與二十拄杖曰恁麼即某甲罪過

同安顯別云祖師來也師曰佛法不恁麼

鏡清云不為打水打水有僧問不為打水意作麼生鏡清云青山碾為塵敢保勿閑人東禪齋云只如玄沙意作麼生或云直饒恁麼去也好與拄杖或云事在當機或云拈破會處此三說還會玄沙意也無

○師應機接物僅三十祀致清原石頭之濬流
迄今不絕轉導來際所演法要有大小錄行
于世自餘語句各隨門弟子章及諸方徵舉
出焉梁開平二年戊辰十一月二十七日示
疾而終壽七十有四臘四十有四閩師為之
樹塔

福州長慶慧稜禪師

杭州鹽官人也姓孫氏幼歲稟性淳淡年十
三於蘇州通玄寺出家登戒歷叅禪肆

唐乾符五年入閩中謁西院訪靈雲尚有凝
滯後之雪峯疑情氷釋

因問從上諸聖傳受一路請垂指示峯默然
師設禮而退峯莞爾而笑

○異日雪峯謂師曰我尋常向師僧道南山有
一條鼈鼻蛇汝諸人切須好看師曰今日堂
中大有入喪身失命峯然之

○師入方丈參雪峯曰是什麼師曰今日天晴
好普請自此耐問未嘗爽於玄旨乃述悟解

頌曰

萬象之中獨露身 唯人自肯乃方親

昔時謬向途中覓 今日看如火裏冰

○師在西院問說上座曰這裏有象骨山汝曾到麼曰不曾到師曰為什麼不到曰自有本分事師曰作麼生是上座本分事說乃提起衲衣角師曰為當只這箇別更有曰和尚見什麼師曰何得龍頭蛇尾

○師在宣州保福後辭歸靈峯保福問師曰山頭和尚

○或問上座信作麼生祇對師曰不避腥羶亦有少許曰信道什麼師曰教我分付阿誰曰從展雖有此語未必有恁麼事師曰若然者前程全自闍梨

○師與保福遊山保福問古人道妙峯山頂莫即這不便是也無師曰是即是可惜許僧問鼓山只如稜和尚恁麼道意作麼生鼓山云孫公若無此語可謂觸體徧野白骨連山

○師來往靈峯二十九載至天祐三年受泉州刺史王延彬請住招慶初開堂日公朝服趨隅曰請師說法師曰還聞麼公設拜師曰雖然如此慮恐有人不肯於是敷揚祖意隨機與奪故義旅憧憧日資道化

後閩師請居長樂府之西院奏額曰長慶號超覺大師上堂良久謂衆曰還有人相悉麼若不相悉欺謾兄弟去只今有什麼事莫有窒塞也無復是誰家屋裏事不肯當荷更待

何時若是利根參學不到這裏來還會麼如今有一般行脚人耳裏總滿也假饒收拾得底還當諸人行脚事麼

○時有僧問行脚事如何學師云但就人索取○又問如何是獨脫一路師云何煩更問

○又問名言妙義教有所詮不涉三科請師直道師云珍重師乃謂衆曰明明歌詠汝尚不會忽被暗來底事汝作麼生

○又僧問如何是暗來底事師云喫茶去中塔

云便請和尚相伴

○問如何是不隔毫端底事師云當不當

○問如何得不疑不惑去師乃展兩手僧不進語師云汝更問我與汝道僧再問之師露膊而坐僧禮拜師曰汝作麼生會僧曰今日風起師曰恁麼道未定人見解汝於古今中有什麼節要齊得長慶若舉得許汝作話主其僧但立而已師却問汝是什麼處人曰向北人師曰南北三千里外學妄語作麼僧無對

○師上堂良久曰莫道今夜較些子便下座

○問如何是合聖之言師曰大小長慶被汝一問口似匾擔僧曰何故如此師曰適來問什麼

○師謂衆曰我若純舉唱宗乘須閉却法堂門所以畫法無民時有僧曰不怕無民請師畫法師曰還委落處麼

○問如何是西來意師曰香嚴道底一時坐却○師有時示衆曰總似今夜老狐有望保福聞

之乃曰總似今夜老亦絕望 玄覺云恁麼道
是相見語不是相見語東禪齊云此二尊宿
語一般各有道理衆中道總似如此嫌什麼
又道總似今夜堪作什麼若如此會欠悟在

○安國瑫和尚新得師號師去賀瑫出接師問
曰師號來耶曰來也師曰是什麼號曰明真
師乃展手瑫曰是什麼處去來師曰幾不問
過僧無對

○師問僧什麼處來曰鼓山來師曰鼓山有跨
石門底句有人借問汝作麼生道曰昨夜報
慈宿師曰拍脊棒汝又作麼生曰和尚若行
此棒不虛受人天供養師曰幾放過

○問古人有言相逢不擊出舉意便知有時如
何師曰知有也未 僧將前語問保福福云此
是誰語僧云丹霞語福云去莫妨我打睡

師入僧堂舉起䟽頭曰見即不見還見麼衆
無對 法眼代云縱受得到別處亦不敢呈人

○師到羅山見新製龕師以杖敲之曰大賤

預備羅山曰拙布置師曰還肯入也無羅山
曰吽

○師上堂大衆集定師乃拽出一僧曰大衆禮
拜此僧又曰此僧有什麼長處便教大衆禮
拜衆無對

○問如何是文彩未生時事師曰汝先舉我後
舉其僧但立而已法眼別云請和尚舉師曰
汝作麼生舉僧曰某甲截舌有分

○保福遷化人問師保福拋却殼漏子向什麼
處去也師曰且道保福在那箇殼漏子裏法
眼別云那箇是保福殼漏子

○閩帥夫人崔氏奉道自稱練師遣使送物至
云練師令就大師請取回信師曰傳語練師
領取回信須臾使却來師前唱諾便回師明
日入府練師曰昨日謝大師回信師曰却請
昨日回信看練師展兩手閩帥問師曰練師
適來呈信還慳大師意否師曰猶較些子法
眼別云這一轉語大王自道取曰未審大師

意旨如何師良久帥曰不可思議大師佛法深遠

○高麗有僧造一觀音像於明州上船衆力昇不起因請人開元寺供養問師無刹不現身為什麼不肯去高麗師曰現身雖普觀相生偏法眼別云汝識得觀音未

○有人問僧點什麼燈曰長明燈曰什麼時點曰去年點曰長明何在僧無語師代曰若不如此爭知公不受人謾法眼別云利動君子

○師兩處開法徒衆一千五百化行閩越二十七載後唐長興三年壬辰五月十七日歸寂壽七十有九臘六十五王建塔

福州大普山玄通禪師

福州福唐人也受業於兜率山師事靈峯經數稔受心法止於大普焉

○僧問驪龍領下珠如何取得師乃拈掌瞬視

○問方便已前事如何師托出其僧

○問如何是祖師西來意師曰咬骨頭漢出去

○問撥塵見佛時如何師曰脫枷來商量

○問急急相投請師接師曰鈍漢

杭州龍冊寺順德大師

道愆永嘉人也姓陳氏壯歲不食葷茹親黨

強啖以枯魚即盟噉上烏沒切下乙劣切遂

求出家於本州開元寺受具遊方抵閩川謁

靈峯峯問什麼處人曰温州人峯曰恁麼即

與一宿覺是鄉人也曰只如一宿覺是什麼

處人峯曰好喫一頓棒且放過

○一日師問只如古德豈不是以心傳心峯曰

無不立文字語句曰只如不立文字語句師

如何傳峯良久師禮謝峯曰更問我一轉豈

不好曰就和和尚請一轉問頭峯曰只恁麼為

別有商量曰和尚恁麼即得峯曰於汝作麼

生曰辜負殺人

○靈峯有時謂衆曰堂堂密密地師出問曰是

什麼堂堂密密靈峯起立曰道什麼師退步

而立峯垂語曰此事得恁麼尊貴得恁麼綿

密對曰道愆自到來數年不聞和尚恁麼示
誨峯曰我向前雖無如今已有莫有所妨麼
曰不敢此是和尚不已而已峯曰致使我如
此師從此信入而且隨衆闡中謂之小愆布
衲因普請處雪峯舉為山見色便見心語問
師還有過也無曰古人為什麼事峯曰雖然
如此要共汝商量曰恁麼即不知道愆鋤地
去了

○一日雪峯問師何處來曰從外來峯曰什麼
處逢見達磨曰更什麼處峯曰未信汝在曰
和尚莫恁麼粘膩好雪峯肯之

○師後遍歷諸方益資權智因訪曹山寂和尚
問什麼處來曰昨日離明水寂曰什麼時到
明水曰和尚到時到寂曰汝道我什麼時到
曰適來猶記得寂曰如是如是

○師罷叅受請止越州鏡清禪苑唱雪峯之旨
學者奔湊副使皮光業者日休之子也詞學
宏贍屢擊難之退謂人曰恁師之高論人莫

窺其極也

○新到僧參師拈起拂子僧曰久嚮鏡清猶有這箇在師曰今日遇人又不遇人

○問如何是靈源一直道師曰鏡湖水可殺深

○問僧什麼處來曰應天來師曰還見鰻鰲魚

麼曰不見師曰閣梨不見鰻鰲鰻鰲不見閣

梨曰總不恁麼師曰閣梨只解慎初護末

○問學人未達其源請師方便師慎是什麼源僧曰其源師曰若是其源爭受方便僧禮拜

退後侍者問曰和尚適來莫是成他問否師曰無曰莫是不成他問否師曰無曰未審畢竟意作麼生師曰一點水墨兩處成龍

○師在帳中坐有僧問訊師撥帳開曰當斷不斷反招其亂僧曰既是當斷為什麼不斷師曰我若畫法只恐無民曰不怕無民請師畫法師曰維那拽出此僧著又曰休休我在南方識伊和尚來

○普請鋤草次浴頭請師浴師不顧如是三請

師舉鑷作打勢浴頭乃走師召曰来来浴頭
回首師曰向後遇作家分明舉似其僧後至
保福舉前語未了保福以手掩其僧口僧却
回舉似師師曰饒汝恁麼未是作家

○師問荷玉什麼處來曰天台來師曰我豈是
問汝天台曰和尚何得龍頭蛇尾師曰鏡清
今日失利

○師看經僧問師看什麼經師曰我與古人鬪
百草師却問汝會麼曰小年也曾恁麼來師

曰如今作麼生僧舉拳師曰我輸汝也

○僧到參師問闍梨從什麼處來曰佛國來師
曰佛以何為國曰清淨莊嚴為國師曰國以
何為佛曰妙淨真常為佛師曰闍梨從妙淨
來莊嚴來曰無不答對師曰噓噓別處有人
問汝不可作這箇語話

○錢王欲廣府中禪會命居天龍寺始見師乃
曰真道人也致禮勤厚由是吳越盛於玄學
其後又創龍冊寺延請居焉

○師上堂曰如今事不得已向汝道若自驗着實箇親切到汝分上因何特地生疎只為拋家日久流浪年深一向緣塵致見如此所以喚作背覺合塵亦名捨父逃逝今勸兄弟未歇歇去好未徹徹去好大丈夫兒得恁麼無氣槩還惆悵麼終日茫茫地何不且覓取箇管帶路好也無人問我管帶一路時有僧問如何是管帶一路師曰噓噓要棒即道曰恁麼即學人罪過也師曰幾被汝打破蔡州

○問無源有路不歸時如何師曰這箇師僧得坐便坐

○問如何是心師曰是即二頭曰不是如何師曰又不成是頭曰是不是總不恁麼時如何師曰更多饒過

○問十二時中以何為驗師曰得力即向我道僧曰諾師曰十萬八千猶可近

○問如何是方便門速易成就師曰速易成就曰爭柰學人領覽來的師曰代得也代得

○問如何是玄中玄師曰不是是什麼曰還得當也無師曰木頭也解語

○問如何是人無心合道師曰何不問道無心合人曰如何是道無心合人師曰

白雲乍可來青嶂明月那教下碧天

○問學人問不到處請師不答和尚答不到處學人即不問師乃搗住曰是我道理是汝道理曰和尚若打學人學人也即却打也師曰得對相耕去

○僧舉有僧辭歸宗宗問什麼處去曰百丈學五味禪去歸宗不語師乃曰緣歸宗是單行底事僧問如何是單行底事師曰棒了趁出院僧禮拜師曰作麼生會曰學人罪過師曰料汝恁麼去

○問承師有言諸方若不是走人便是籠人罩人未審和尚如何師曰被汝致此一問直得當門齒落

○問如何是親的密密底事師曰常用及人曰

不知者如何師曰好晴好雨

○師問僧門外什麼聲曰雨滴聲師曰衆生顛倒迷已逐物法眼別云畫出

○僧問如何是同相師將火筋插向爐中

僧又問如何是別相師又將火筋插向一邊法眼別云問不當理

○有僧引童子到曰此兒常愛問僧佛法請和尚驗看師乃令點茶童子點茶來師啜訖過盞托與童子童子近前接師却縮手曰還道

得麼童子曰問將來法眼別云和尚更喫茶

否僧問和尚此兒子見解如何師曰也只是
一兩生持戒僧

○師三處開法語要隨門人編錄今但梗槩而已

○晋天福二年丁酉八月示滅壽七十四黑白
衰號制服者衆茶毗於大慈山獲舍利就龍
母山之陽建塔

福州長生山皎然禪師

本郡人入雪峯室密受心印執侍經十載因與僧斫樹峯曰斫到心且住師曰斫却著峯曰古人以心傳心汝為什麼道斫却師擲下斧子曰傳峯打一拄杖而去

○僧問雪峯如何是第一句峯良久僧退舉似於師師曰此是第二句峯再令其僧來問如何是第一句師曰蒼天蒼天

○雪峯普請般柴問師曰古人道誰知席帽下元是昔愁人古人意作麼生師側戴笠子曰

這箇是什麼人語

○雪峯問師持經者能荷檐如來作麼生是荷檐如來師乃捧峯向禪床上著

雪峯普請歸自將一束藤路逢一僧放下藤叉手立其僧近前拈峯即踏其僧峯歸院後舉示於師曰我今日踏却那僧得恁麼快師對曰和尚却替那僧入涅槃堂法眼住崇壽時有二僧各說道理請師斷法眼云汝兩僧一時入涅槃堂玄覺云什麼處是替那僧入

涅槃堂處崇壽稠云此一轉語却還老兄東
禪齊云只如長生意作麼生

○師嘗訪一庵主款話庵主曰近有一僧問某
甲西來意遂舉拂子示之不知還得也無師
曰爭敢道得與不得

○有人問庵主此事有人保任如虎頭帶角有
人嫌棄則不直一錢此事為什麼毀譽不同
試請揀出看曰適來出自偶然爭揀得出師
曰怎麼此後不得為人玄覺云一等是怎麼

事為什麼有得有失上座若無智眼難下得
失

○雲峯問師光境俱亡復是何物師曰放皎然
過敢有商量峯曰許汝過作麼生商量曰皎
然亦放和尚過峯深許之尋受記止于長生
山分化焉

僧問從上宗乘如何舉唱師曰不可為閣梨
荒却長生山也

○問古人有言無明即佛性煩惱不須除如何

是無明即佛性師忿然作色舉拳呵曰今日打這師僧去也僧曰如何是煩惱不須除師以手拏頭曰這師僧得恁麼發人業

○問路逢達道人不將語默對未審將什麼對師曰上紙墨堪作什麼

○閩帥署禪主大師莫知所終

信州鸞湖智孚禪師

福州人也始依講肆肄業於長安因思玄極之理乃造雪峯師事數年既領心訣隨緣而

止鸞湖大張法席

○僧問萬法歸一一歸何所師曰非但闍梨一人忙

○問虛空講經以何為宗師曰闍梨不是聽衆出去

○問五逆之子還受父約也無師曰雖有自裁未免傷已

○問如何是佛向上人師曰情知闍梨不柰何曰為什麼不柰何師曰未必小兒得見君子

○有人報云徑山和尚遷化也僧問徑山遷化
向什麼處去師曰大有靈利底過於闍梨

○問在先一句請師道師曰脚跟下採取什麼
曰即今見問師曰看闍梨變身不得

○問雪峯拋下拄杖意作麼生師以香匙拋下
地僧曰未審此意如何師曰不是好種出去

○問如何是鷺湖第一句師曰道什麼曰如何
即是師曰妨我打睡

○問不問不答時如何師曰問人焉知

問迷子不歸家時如何師曰不在途曰歸後
如何師曰正迷

○問如何是源頭事師曰途中覓什麼

○問如何是一句師曰會麼曰恁麼莫便是否
師曰蒼天蒼天

○鏡清問如何是即今底師曰何更即今清曰
幾就支荷師曰語逆言順

漳州報恩院懷岳禪師

泉州人也少依本州聖壽院受業罷參雪峯

止龍谿玄侶奔湊

○僧問十二時中如何行履師曰動即死曰不動時如何師曰猶是守古塚鬼

○問如何學人出身處師曰有什麼物纏縛關梨曰爭柰出身不得何師曰過在阿誰

○問如何是報恩一靈物師曰喫如許酒糟乍麼曰還露脚手也無師曰這裏是什麼處所
○僧問牛頭未見四祖時如何師曰萬里一片雲曰見後如何師曰廓落地

○僧問如何是佛法大意師曰三更失却火

○問黑雲斗暗誰當雨者師曰峻處先傾

問宗乘不却如何舉唱師曰山不自稱水無間斷
問佛未出世時如何師曰汝爭得知

○問撥塵見佛時如何師曰什麼年中得見來

○問師子在窟時如何師曰師子在什麼處

○問如何是目前佛師曰快禮拜

○師臨遷化上堂示衆曰山僧十二年來舉提宗教諸人怪我什麼處若要聽三經五論此

去開元寺咫尺言訖告寂

杭州西興化度悟真大師

師都泉州人也自得雪峰心印化緣盛于杭
越之間後居西興鎮之化度院法席大興

○僧問如何是西來意師舉拂子僧曰學人不
會師曰喫茶去

○問如何是縫塔師曰五尺六尺

○問如何是一塵師曰九世剎那分曰如何含
得法界師曰法界在什麼處

○問谿谷各異師何明一師曰汝喘作麼

○問學人初機乞和尚指示入路師曰汝怪化
度什麼處

○問如何是隨色摩尼珠師曰青黃赤白曰如
何是不隨色摩尼珠師曰青黃赤白

○問如何是西來意師曰是東來西來

○問牛頭未見四祖時如何師曰鳥獸俱迷曰
見後如何師曰山深水冷

○問維摩與文殊對談何事師曰

唯有門前鏡湖水清風不改舊時波

師自是聲聞于遐邇錢王欽其道德奏紫衣師號
福州鼓山興聖國師

神晏大梁人也姓李氏幼惡葷羶樂聞鍾梵
年十二時有白氣數道騰于所居屋壁師即
揮毫書其壁曰

白道從茲速改張休來顯現作妖祥定祛邪
行歸真見必得超凡入聖鄉

題罷氣即隨滅季甫志學遘疾甚亟夢神人

與藥覺而頓愈明年又夢梵僧告曰出家時
至矣遂依衛州白鹿山道規禪師披削嵩岳
受具謂同學曰古德云四羯磨後全體戒定
慧豈准繩而可拘也於是杖錫遍叩禪關而
但記語言存乎知解及造雪嶺朗然符契
一日參雪峯雪峯知其緣熟忽起搗住曰是
什麼師釋然了悟亦忘其了心唯舉手搖曳
而已峯曰子作道理耶師曰何道理之有峯
審其懸解撫而印之暨峯歸寂闕帥於府城

之左二十里開鼓山創禪宮請揚宗致

師上堂衆集良久曰南泉在日亦有人舉要
且不識南泉即今還有識南泉者麼試出來
對衆驗看

時有僧出禮拜纔起師曰作麼生僧近前曰
咨和尚師曰不才請退又曰經有經師論有
論師律有律師有函有號有部有袞各有人
傳持且佛法是建立教禪道乃止啼之說他
諸聖興來蓋為人心不等巧開方便遂有多

門受疾不同處方還異在有破有居空叱空
三患既除中道須遣鼓山所以道句不當機
言非展事承言者喪滯句者迷不唱言前寧
談句後直至釋迦掩室淨名杜口大士梁時
童子當日一問二問三問盡有人了也諸仁
者作麼生

時有僧禮拜師曰高聲僧問曰學人咨和尚
師乃喝出

問已事未明以何為驗師抗音似未聞其僧

再問師曰一點随流食咸不重

○問如何是包盡乾坤底句師曰近前僧近前師曰鈍置殺人

○問如何紹得師曰行俗無風徒勞展掌曰如何即是師曰錯

○問學人便承當時如何師曰汝作麼生承當法燈別云莫費力

○問如何是學人正立處師曰不從諸聖行法燈別云汝擬亂走

○問千山萬山阿那箇是正山師曰用正山作麼法燈云千山萬山

○師與招慶相遇招慶曰家常師曰無厭生招慶曰且款款師却云家常招慶曰今日未有

火師曰太鄙吝生招慶曰穩便將取去東禪

齊拈云此二尊宿語還有得失也無若有阿那箇得阿那箇失若無得失諸人未具行脚眼在

○問如何免得輪迴生死師曰把將生死來

○問如何是宗門中事師側掌曰吽吽

○問如何是向上一闕被子師乃打之

○問如何是鼓山正主師曰瞎作麼

○師問保福古人道非不非是不是意作麼生

保福拈起茶觥師曰莫是非好

○問如何是真實人體師曰即今是什麼體曰

究竟如何師曰爭得到恁麼地

○問如何是佛法大意師曰

金烏一點萬里無雲

○師問僧鼓山有不跨石門句汝作麼生道僧

曰請師乃打之

○問如何是古人省心力處師曰汝何費力

○問言滿天下無口過如何是無口過師曰有

什麼過

○問如何是省要處師曰還自耻麼

○師與閩帥瞻仰佛像閩帥問是什麼佛曰請

大王鑒曰鑒即不是佛曰是什麼帥無對長

慶代云久承大師在衆何得造次

○問從上宗乘如何舉唱師以拂子驀口打
○問如何是教外別傳底事師曰喫茶去又曰
今為諸仁者刺頭入他諸聖化門裏斗藪不
出所以向仁者道教排不到祖不西來三世
諸佛不能唱十二分教載不起凡聖攝不得
古今傳不得忽爾是箇漢未通箇消息向他
恁麼道被他驀口擱還怪得他麼雖然如此
也不得亂擱鼓山尋常道更有一人不跨石
門須有不跨石門句作麼生是不跨石門句

鼓山自住三十餘年五湖四海來者向高山
頂上看山翫水未得一人快利通得如今還
有人通得也不昧兄弟珍重乃有偈示衆曰
直下尤難會 尋言轉更賒

若論佛與祖 特地隔天涯

閩帥禮重常詢法要焉

漳州隆壽興法大師

紹卿泉州人也姓陳氏幼於靈岩寺習經論
講業既就而深慕禪那乃問法于靈峯之室

服勤數載從緣開悟因侍經行見芋葉動雪
峯指動葉視之師對曰紹卿甚生怕怖雪峯
曰是汝屋裏底怕怖什麼師於是洗然省悟
頓息他遊尋受請居龍谿焉

○僧問古人道摩尼殿有四角一角常露如何
是常露底角師舉拂子

○問齋糧不畜一粒如何濟得萬人饑師曰俠
客面前如奪劍看君不是點兒郎

○問大拍盲底人來師還接否師曰前後大應

得此便也曰莫便是接否師曰這裏漢來裏

搯紫

○問耳目不到處如何師曰汝無此作曰恁麼
即聞也師曰真个聾漢

○漳守王公欽尚祖風為奏紫衣師名

福州僊宗院仁慧大師

行瑫泉州人也姓王氏本州開元受業預雪
峯禪會聲聞四遠閩帥請轉法輪玄徒奔至
上堂曰我與釋迦同叅汝道問什麼人

○時一僧入禮拜擬伸問師曰錯

○問如何是西來意師曰熊耳不魯藏

○問直下事乞師方便師曰不因汝問我亦不
道又問如何是西來意師曰白日無閑人

福州蓮花山永福院超證大師

從弇先住漳州報恩院

○僧問儒門以五常為極則未審宗門以何為
極則師良久僧曰恁麼即學人造次也師曰
好與拄杖

○問教云唯有一乘法如何是一乘法師曰汝
道我這裏作什麼曰恁麼即不知教意也師
曰雖然如此却不辜負汝

○問不向問處領猶是學人問處和尚如何師
曰喫茶去

○長慶常云畫法無民師曰永福即不然若不
畫法又爭得民時有僧曰請師畫法師曰我
不要汝納稅

○問諸餘即不問聊徑處乞師垂慈師曰不快

禮三拜

○師上堂曰吐吐看箭過便歸方丈

○問請師盡令師曰莫埋沒

○問大衆雲集請師說法師曰聞麼曰若更佇思應難得及師曰實即得

○問摩尼殿有四角一角常露如何是常露底角師曰不可更點

○師上堂於坐邊立謂衆曰二尊不並化便歸方丈

杭州龍華寺真覺大師

靈照高麗人也萍遊閩越并雪峯之堂冥符玄旨居唯一衲服勤衆務閩中謂之照布衲

○一夕指半月問溥上座那一片什麼處去也溥曰莫妄想師曰失却一片也衆雖歎美而恬淡自持

○初止婺州齊雲山上堂良久忽舒手視其衆曰乞取些子乞取些子又曰一人傳虛萬人傳實

僧問草童能歌舞未審今時還有無師下座
作舞曰沙彌會麼僧曰不會師曰山僧蹋曲
子也不會

○問靈山會上法法相傳未審齊雲將何付囑
師曰不可為汝一人荒却齊雲也曰莫便是
親付囑也無師曰莫令大眾笑

○問還丹一粒點鐵成金至理一言點凡成聖
請師一點師曰還知齊雲點金成鐵麼曰點
金成鐵未之前聞至理一言敢希垂示師曰

句下不薦後悔難追

○師次居越州鏡清院海衆悅隨一日謂衆曰
盡令去也僧曰請師盡令師曰吽吽

○問如何是學人本分事師曰鏡清不惜口

○問請師雕琢師曰八成曰為什麼不十成師
曰還知鏡清生修理麼

師問僧什麼處來曰五峯來師曰還作什麼
曰禮拜和尚師曰何不自禮曰禮了也師曰
鏡湖水淺

住持金 卷之十一
○問如何是第一句師曰莫錯下名言曰師豈無方便師曰烏頭養雀兒

○問向上一路千聖不傳未審什麼人傳得師曰千聖也疑我曰莫便是傳也無師曰晉帝斬嵇康

○問釋迦掩室於摩竭淨名杜口於毗耶此意如何師曰東廊下兩兩三三師謂衆曰諸方以毘盧法身為極則鏡清這裏即不然須知毘盧有師法身有主

問如何是毘盧師法身主師曰二公爭敢說

○問古人道見色便見心此即是色那個是心師曰恁麼問莫欺山僧麼

○問未到已前請師斷師曰落在什麼處曰恁麼即失口也師曰寒山送瀉山又曰住住閣梨失口山僧失口曰惡虎不食子師曰驢頭出馬頭迴

○師薦問一僧記得麼曰記得師曰道什麼師曰淮南小兒入寺

○問是什麼即俊鷹俊鷄趁不及師曰闍梨別
問山僧別答曰請師別答師曰
十里行人較一程

○問金屑雖貴眼裏着不得時如何師曰著不
得還着得麼僧禮拜師曰深沙神

○問菩提樹下度衆生如何是菩提樹師曰大
似苦練樹曰為什麼似苦練樹師曰素非良
馬何勞鞭影

○後湖守錢公卜杭之西關創報慈院廷請開

法禪衆翕然依附尋而錢王建龍華寺迎金
華傳大士靈骨道具寘焉命師住持

○晉天福十年丁未閏七月二十六日終於本
寺壽七十八塔于大慈山

明州翠岩永明大師

令叅湖州人也自雪峯受記止于翠岩大張
法席

○問不借三寸請師道師曰茶堂裏貶剥去

○問國師三喚侍者意旨如何師曰

柳逼人作麼

問諸餘即不問師默之僧曰如何舉似於人
師喚侍者點茶來

○師上堂曰今夏與諸兄弟語論看翠岩眉毛
還在麼 長慶聞舉云生也

○問凡有言白盡是點汗如何是向上事師曰
凡有白盡是點汗

○問如何是省要處師曰大衆笑汝

○問坦然不滯鋒鋦時如何師曰大有人作此

見解曰畢竟如何師曰坦然不滯鋒鋦

○問古人拈槌豎拂意旨如何師曰邪法難扶

○問僧繇為什麼寫誌公真不得師曰作麼生
合殺

○問險惡道中以何為津梁師曰

藥山再三叮囑

○問不帶凡聖當機何示師曰莫向人道翠岩
靈利

○問妙機言白盡皆不當宗乘中事如何師曰

禮拜著曰學人不會師曰出家行腳禮拜也
不會

○錢王向師道風請居龍冊寺終焉

萬僧問答景德傳燈全錄卷之十八



萬僧問答景德傳燈全錄卷之十九

古汴道原太師纂集

新安朝用汪士賢校

福州雪峯義存禪師法嗣

福州安國院明真大師

弘瑫泉州人也姓陳氏幼絕葷茹自誓出家
於龍華寺東禪始圓戒體而造于雪峯雪峯
觀其少雋堪為法器乃導以本心信入過量
徧參禪苑獲諸方三昧却回雪峯

國家圖書館 NATIONAL CENTRAL LIBRARY, TAIWAN, R.O.C.

008485

國立中央圖書館藏善本
書名：萬僧問答景德傳燈全錄
著者：宋釋道原撰
版本：明新安汪士賢校刊本

靈峯問什麼處來曰江西來峯曰什麼處見
達磨曰分明向和尚道峯曰道什麼曰什麼
處去來

○一日峯見師搗住曰畫乾坤是箇解脫門把
手教伊入不肯入曰和尚怪弘瑫不得峯曰
雖然如此爭柰背後許多師僧何師因舉國
師碑文云得之於心伊蘭作旃檀之樹失之
於首甘露乃疾梨之園拈問僧曰一語須見
得失兩意汝作麼生道僧舉峯曰不可喚作

拳頭也師不肯亦舉峯別云只為喚這不作
拳頭

○師受請止園山毘徒臻集

後閱師句師道德命居安國寺大闡玄風徒
餘八百矣

○僧問如何是西來意師曰是即是莫錯會

○問如何是第一句師曰問問

○問學人上來未盡其機請師盡機師良久僧
禮拜師曰忽到別處人問汝作麼生舉曰終

不敢錯舉師曰未出門已見笑具

問如何是達磨傳底心師曰素非後躅

○問如何是宗乘中事師曰不可為老兄散却
衆也

○問不落有無之機請師全道師曰汝試斷看

○問如何是一毛頭事師拈起袈裟僧曰乞師
指示師曰

抱璞不須頻下淚來朝更獻楚王看

○問寂寂無言時如何師曰更進一步

○問凡有言白皆落因緣方便不落因緣方便

事如何師曰結禱之士頻逢抱甕之流罕遇

○問向上一路千聖不傳未審和尚如何傳師
曰且留口喫飯着

○問如何是高尚底人師曰

河濱無洗耳之叟磻溪絕垂釣之人

○問十二時中如何救得生死師曰

執鉢不須窺衆樂履水何必步參差

○問學人擬問宗乘師還許也無師曰但問僧

擬問師乃喝出

○問目前生死如何免得師曰把將生死來

○問知有底人為什麼道不得師曰

汝命名什麼

○問如何是活人之劍師曰不敢瞎却汝曰如何是殺人刀師曰只這個是

○問不犯鋒鏑如何知音師曰驢年去

○問苦澁處乞師一言師曰可殺沈吟曰為什麼如此師曰也須相悉好

○問常居正位底人還消人天供養否師曰消不得曰為什麼消不得師曰是什麼心行曰什麼人消得師曰着衣喫飯底消得

○師舉稜和尚住招慶時在法堂東角立謂僧曰這裏好致一問僧便問和尚為何不居正位稜曰為汝恁麼來曰即今作麼生稜曰用汝眼作麼師舉畢曰他家恁麼問別是個道理如今作麼生道後安國曰恁麼即大眾一時散去得也師亦自代云恁麼即大眾一時

禮拜

襄州雲蓋山雙泉院歸本禪師

亦曰西雙泉以隨州有東雙泉故也

師京兆府人也幼出家十六納戒念法華經
初禮靈峯靈峯下禪床跨背而坐師於是因
此省覺

○僧問如何是雙泉師曰可惜一雙眉曰學人
不會師曰不曾煩禹力湍流事不知

○問如何是西來的的意師乃搗住其僧變色

師曰我這裏無這个

○師手指纖長特異于人號手相大師

韶州林泉和尚 先住巖山

僧問如何是塵師曰不覺成丘山

○師謁白雲慈光大師辭出曰雲門送扶下塔
曰款款莫教躓倒師白忽然躓倒又作麼生
白雲曰更不用扶也師大笑而退

○洛京南院和尚問如何是法法不生師曰生
○有儒士博覽古今時人呼為張百會一日來

謁師師曰莫是張百會麼曰不敢師以手於空畫一畫曰會麼曰不會師曰一尚不會什麼處得百會來

○越州洞岩可休禪師問如何是洞巖正主師曰開着

○開如何是和尚親切為人處師曰大海不宿死屍

○問如何是向上一路師舉衣領示之

○問學人遠來請師方便師曰方便了也

○定州法海院行周禪師問風恬浪靜時如何師曰吹倒南牆

○問如何是道中寶師曰不露光曰莫便是否師曰是即露也

杭州龍井通禪師

處樓上座問如何是龍井龍師曰意氣天然別神工畫不成曰為什麼畫不成師曰出群不戴角不與類中同曰還解行雨也無師曰普潤無邊際處處皆結粒曰還有宗門中事

也無師曰有曰如何是宗門中事師曰從來無形段應物不曾虧

○問如何是吹毛劍師曰拽出死屍著

漳州保福院從展禪師

福州人也姓陳氏年十五禮雪峯為受業師十八本州大中寺具戒遊吳楚開後歸執侍雪峯一日忽召曰還會麼師欲近前雪峯以杖拄之師當下知歸作禮而退

○又常以古今方便詢于長慶稜和尚稜深許

之長慶稜和尚有時云寧說阿羅漢有三毒不說如來有二種語不道如來無語只是無二種語師曰作麼生是如來語曰聾人爭得聞師曰情知和尚向第二頭道長慶却問作麼生是如來語師曰喫茶去雲居錫云什麼處是長慶向第二頭道處

因舉盤山云光境俱亡復是何物洞山云光境未亡復是何物師曰據此二尊者商量猶未得勦絕乃問長慶如今作麼生道得勦絕

長慶良父師曰情知和尚向山鬼窟裏作活計長慶却問作麼生師曰兩手扶犁水過膝
○一日長慶問見色便見心還見船子麼師曰見曰船子且置作麼生是心師却指船子歸宗柔別云和尚只解問人

○雪峯謂衆曰諸上座到望州亭與上座相見了到烏石嶺與上座相見了到僧堂前與上座相見了師舉問鵝湖曰僧堂前相見即且置只如望州亭烏石嶺什麼處是相見鵝湖

驟步入方丈師歸僧堂東禪齋云此二尊宿會處是相見不相見試斷看

○梁貞明四年丁丑歲漳州刺史王公欽承道譽創保福禪苑迎請居之

○開堂日王公禮跪三請躬自扶掖升堂師曰須起个笑端作麼然雖如此再三不容推免諸仁者還識麼若識得便與古佛齊肩時有僧出方禮拜師曰晴乾不肯去直待雨淋頭僧乃申問曰郡守崇建精舍大闡真風

便請和尚舉揚宗教師曰還會麼曰恁麼即
群生有賴也師曰莫把那不淨塗汗人好僧
出禮拜師曰大德好與麼莫覆却船子

○問泯默將何為則師曰落在什麼處曰不會
師曰瞌睡漢出去

○師見一僧乃以杖子打露柱又打其僧頭僧
作忍痛聲師曰那箇為什麼不痛僧無對玄
覺代云貪行拄杖

○問摩騰入漢一藏分明達磨西來將何指示

師曰上座行脚事作麼生曰不會師曰不會
會取好莫傍家取人處分若是久在叢林粗
委些子遠近可以隨處認真其有初心後學
未知次序山僧所以不惜口業向汝道塵劫
來事只在如今還會麼然佛法付祝國王大
臣郡守昔同佛會今方如是若是福祿榮貴
則且不論且如當時受佛付祝底事還記得
麼若識得便與千聖齊眉儻未識得直須諦
信此事不從人得自己亦非言多去道轉遠

直道言語道斷心行處滅猶未是在大眾久
立珍重

○異日上堂大眾雲集師曰有人從佛殿後過
見是張三李四從佛殿前過為什麼不見且
道佛法利害在什麼處僧曰為有一分粗境
所以不見師乃叱之自代曰若是佛殿即不
見僧曰不是佛殿還可見否師曰不是佛殿
見什麼

○問十二時中如何據驗師曰恰好據驗曰學
人為什麼不見師曰不可更捏目去也

○問主伴重重極十方而齊唱如何是極十方
而齊唱師曰汝何不教別人問

○問因言辯意時如何師曰因什麼言僧低頭
良久師曰擊電之機徒勞佇思

○問欲入無為海須乘般若船如何是般若船
師曰便請曰便恁麼進去時如何師曰也是
涅槃堂裏漢

○師見僧喫飯乃托鉢曰家常僧曰和尚是什

磨心行

○有尼到叅師曰阿誰侍者報云覺師姑師曰
既是覺師姑用來作麼尼曰仁義道中即不
無師自別云和尚是什麼心行玄覺因舉法
眼見僧擔土乃以一塊土放擔上云吾助汝
僧云謝和尚慈悲法眼不肯有一僧別云和
尚是什麼心行法眼便休玄覺徵云此三則
語一般別有道理什麼處是心行處

○聞帥遣使送朱記到師上堂曰去即印住住

即印破僧曰不去不住用印奚為師乃打之
僧曰恁麼即山鬼窟裏全因今日也師乃默
已玄覺云什麼處是山鬼窟叢林中道住在
不去不住處便是山鬼窟所以打破如此商
量正是鬼窟且道保福打伊意作麼生

○師問僧什麼處來曰江西師曰學得底那曰
拈不出師曰作麼生法眼別云謾語僧無對

○師舉洞山真贊云徒觀紙與墨不是山中人
僧問如何是山中人師曰汝試邀掠者曰若

不點兒幾成邀掠師曰汝是點兒曰和尚是
什麼心行師曰來言不豐

○師見僧數錢乃展手曰乞我一文曰和尚因
何到恁麼地師曰我到恁麼地曰若到恁麼
地將取一文去師曰汝為何到恁麼地

○師問僧什麼處來曰江西觀音師曰還見觀
音麼曰見師曰左邊見右邊見曰見時不歷
左右法眼別云如和尚見

○問如何是入火不燒入水不溺師曰若是水

火即被燒溺

○師問飯頭鑊澗多少曰和尚試量看師以手
作量勢曰和尚莫謾某甲師曰却是汝謾我
○問欲達無生路應須識本源如何是本源師
良久却問侍者適來僧問什麼其僧再舉師
乃喝出曰我不患聾

○問學人近入叢林乞師全示入路師曰若教
全示我却禮拜汝

○師見一僧乃曰汝作什麼業來得恁麼長大

曰和尚短多少師躡身作短勢僧曰和尚莫
謾人好師曰却是汝謾我

○師令侍者屈隆壽長老云但獨自來莫將侍
者來壽曰不許將來爭解離得師曰大殺恩
愛壽無對師自代曰更謝和尚上足傳示

○師住保福僅一紀學眾常不下七日其接機
利物不可備錄

閩師禮重為奏命服

唐天成三年戊子示有微疾僧入丈室問訊

師謂之曰吾與汝相識年深有何方術相救僧

曰方術甚有聞說和尚不解忌法燈別云和尚解忌口麼

又謂眾曰吾旬日來氣力困劣別無他只是

時至僧時既至矣師去即是住即是師曰道

曰恁麼即某甲不敢造次師曰失錢遭罪言

訖跣趺告寂即三月二十一日也

泉州睡龍山道溥號弘教大師

福州福唐人也姓鄭氏寶林院受業自雪峯

印心住五峯

上堂曰莫道空山無祇待便歸方丈

○僧問凡有言句不出大千頂未審頂外事如何師曰凡有言句不是大千頂曰如何是大千頃師曰摩醯首羅天猶是小千界

○問初心後學近入叢林方便門中乞師指示師敲門枋僧曰向上還有事也無師曰有曰如何是向上事師再敲門枋

杭州龍興宗靖禪師

台州人也初參雪峯密承宗印乃自誓克飯

頭服勞逾十載嘗於衆堂中祖一麻釘簾雪峯覩而記曰汝向後任持有千僧其中無一人衲子也師悔過辭歸故里住六通院錢王命居龍興寺有衆千餘唯三學講誦之徒果如雪峯所誌

○周廣順初年八十一錢王請於寺之大殿演無上乘黑白駢擁

○僧問如何是六通奇特之唱師曰天下舉去○問如何是六通家風師曰

一條布袖一斤有餘

○問如何是學人進前一路師曰誰敢謾汝曰豈無方便師曰早是屈抑也

○問如何是和尚家風師曰早朝粥齋時飯曰更請和尚道師曰老僧困曰畢竟作麼生師大笑而已

○錢王特加禮重屢延入府以始住院署六通大師顯德元年甲寅十二月示寂壽八十四塔于大慈山

福州南禪契璠禪

師上堂曰若是名言妙句諸方總道了也今日衆中還有超第一義者致得一句麼若有即不辜於人時有僧問如何是第一義師曰何不問第一義曰見問師曰已落第二義也○問古佛調曲請師和師曰我不和汝雜亂底曰未審為什麼人和師曰什麼處去來

越州諸暨縣越山師鼎號鑒真禪師

初叅雪峯而染指後因闍王請於清風樓齋

坐久舉目忽覩日光豁然頓曉而有偈曰
清風樓上赴官齋 此日平生眼豁開
方識普通年遠事 不從葱嶺路將來
歸呈雪峯雪峯然之

○僧問如何是佛身師曰汝問那個佛身曰釋迦佛身師曰舌履三千界

○師臨終時集衆示一偈曰

眼光隨色盡

耳識逐聲消

還源無別旨

今日與明朝

偈畢跏趺而逝

南岳金輪可觀禪師

福州福唐人也姓薛氏依石佛寺齊合禪師披剃戒度既圓便叅雪峯峯曰近前師方近前作禮峯舉足蹋之師忽然冥契師事十二年復歷叢林止南岳法輪峯

師上堂謂衆曰我在雪峯遭他一踏直至如今眼不開不知是何境界

○僧問如何是西來意師曰不是

○大衆夜參後下堂師召曰大衆衆回首師曰
看月大衆看月師曰

月似彎弓少雨多風衆無對

○問古人道毗盧有師法身有主如何是毗盧
盧師法身主師曰不可牀上安牀

○問如何是日用事師拊掌三下僧曰學人未
領此意師曰更待什麼

○問從上宗乘如何為人師曰我今日未喫茶
曰請師指示師曰過也

○問正則不問請師傍指師曰抱取猫兒去

○師問僧什麼處來曰華光師即托出閉却門
僧無對

○問路逢達道人不將語默對未審將何對師
曰咄出去

○師問僧作麼生是靚面事曰請師鑒師曰恁
麼還當麼曰故為即不可師曰別是一着

○問如何是靈源一路師曰蹋過作麼

○靈峯院主有書來招師曰山頭和尚年尊也

長老何不再入嶺一轉師廻書曰待山頭和尚別有見解即入嶺

有僧問如何是靈峯見解師曰我也驚

泉州福清院玄訥禪師

高麗人也初住福清道場傳象骨之登學者歸慕

○泉守王公問如何是宗乘中事師叱之

僧問如何是觸目菩提師曰閻梨失却半年糧曰為什麼失却半年糧師曰只為圖他一

斗米

○問如何是清淨法身師曰蝦蟆曲蟻

○問教云唯一堅密身一切塵中現如何是堅密身師曰驢馬猫兒曰乞師指示師曰驢馬也不會

○問如何是物物上下明師展一足示之師住福清三十年大闡玄風終於本山

韶州雲門山文偃禪師

姑蘇嘉興人也姓張氏初叅睦州陳尊宿發

明大旨後造雪峯而益資玄要因藏器混衆
于韶州靈樹敏禪師法席居第一座敏將滅
度遺書於廣主請接踵住持師不忘本以雪
峯為師

開堂日廣主親臨問曰弟子請益師曰目前
無異路法眼別云不可無益於人師曰莫道
今日謾諸人好抑不得已向諸人前作一場
狼籍忽遇明眼人見謂之一場笑具如今亦
不能避得也且問你諸人從上來有什麼事

欠少什麼向你道無事亦是謾你也須到這
田地始得亦莫稱口亂問自己心裏黑漫漫
地明朝後日大有事在你若是根性遲迴且
向古人建化門庭東覷西覷看是个什麼道
理汝欲得會麼都緣是汝自家無量劫來妄
想濃厚一期間人說着便生疑心問佛問祖
向上向下覓求解會轉沒交涉擬心即差况
復有言莫是不擬心是麼更有什麼事珍重
○師上堂云我事不獲已向你諸人道直下無

事早是相埋沒了也你諸人更擬進步向前
尋言逐句求覓解會千差萬巧廣設問難只
是贏得一場口滑去道轉遠有什麼休歇時
此个事若在言語上三乘十二分教豈是無
言語因什麼更道教外別傳若從學解機智
得只如十地聖人說法如雲如雨猶被呵責
見性如隔羅縠以此故知一切有心天地懸
殊雖然如此若是得底人道火不可燒終日
說事不曾挂著唇齒未曾道著一字終日著

衣喫飯未嘗觸着一粒米挂一縷線雖然如
此猶是門庭之說也須實得恁麼始得若約
衲僧門下句裏呈機徒勞佇思直饒一句下
承當得猶是瞌睡漢

師云三乘十二分教橫說豎說天下老和尚
縱橫十字說與我捻針鋒說底道理來看恁
麼道早是死馬醫雖然如此且有幾個到此
境界不敢望汝言中有響句裏藏鋒瞬目千
差風恬浪靜伏惟尚享珍重

○師上堂云諸兄弟盡是諸方參尋知識決擇生死到處豈無尊宿垂慈方便之詞還有透不得底白麼出來舉看老漢大家共你商量時有僧出來禮拜擬舉次師云去去西天路迢迢十萬餘

○問學人簇簇地商量个什麼師云大眾久立師云舉一則語教汝直下承當早是撒屎着汝頭上直然拈一毫頭盡大地一時明得也是剝肉作瘡雖然如此汝亦須實到這個田

地始得若未切不得掠虛却退步向自己根脚下推尋看是个什麼道理實無絲髮與汝作解會與汝作疑惑汝等各各且當人一段事大用現前更不煩汝一毫頭氣力便與祖佛無別自是諸人信根淺薄惡業濃厚突然起得許多頭角擔鉢囊千鄉萬里受屈且汝諸人有什麼不足處大丈夫漢阿誰無分觸目承當得猶是不著便不可受人欺謾取人處分才見老和尚動口便好把特石驀口塞

便是屎上青蠅相似鬪競接將去三個五個
聚頭地商量若屈兄弟他古德一期為你諸
人不柰何所以方便垂一言半句通汝入路
這般事捨放一邊獨自著些子筋骨豈不是
有少許相親處快與快與時不待人出息不
保入息更有什麼身心別處閑用切須在意
在意珍重

○師云畫乾坤一時把將來着汝眼睫上你諸
人聞恁麼道不敢望你出來性燥把老漢打

一摑且緩緩子細看是有是無是個什麼道
理直饒向這裏明得若遇衲僧門下好搥折
兩脚汝若是個人聞說道什麼處有老宿出
世便好摹面唾汚我耳目汝若不是个脚手
纔聞人舉便當荷得早落第二機也汝且看
他德山和尚纔見僧上來拽拄杖便打趁睦
州和尚纔見僧入門來便云見成公案放汝
三十棒自餘之輩合作麼生若是一般掠虛
漢食人涎唾記得一堆一擔骨幢到處馳騁

驢唇馬嘴誇我解開十轉五轉話饒你從朝
問到夜論劫恁麼還曾夢見也未什麼處是
與人着力處似這般底有人屈袖僧齋也道
我得飯喫堪什麼共語他日閻羅王面前不
取你口解說諸兄弟若是得底人他家依衆
遣日若也未得切莫容易過時大須子細看
○古人大有葛藤處即如靈峯和尚道盡大地
是汝夾山云百草頭上薦取老僧開市中識
取天子樂普云一塵才舉大地全收一毛頭

師子全身總是汝把取翻覆思量日久歲深
自然有個人入路此事無你替代處莫非各在
當人分上老和尚出世只是為你證明汝若
有少許來由且昧你亦不得你若實未得方
便撥汝則不可兄弟一等是蹋破草鞋拋却
師長父母行脚直須着些子精彩始得實若
有個人頭處遇着咬猪狗脚手不惜性命入
泥入水相為有可咬嚼眨上眉毛高挂鉢囊
拗折拄杖十年二十年辦取徹頭莫愁不成

辨直是令生未得徹頭來生亦不失人身向
此个門中亦乃省力不虛辜負平生亦不辜
負師長父母十方施主直須在意莫空遊州
獵縣橫檐拄杖一千二千里走越這邊經冬
那邊過夏好山水堪取性多齋供易得衣鉢
若屈畜他一粒米失却半年糧如此行脚有
什麼利益信心檀越把菜粒米作麼生消得
直須自看時不待人忽然一日眼光落地前
頭將什麼抵擬莫一偈落湯螬蟬手脚忙亂

無住掠虛說大話處莫將等閑空過時光一
失人身萬劫不復不是小事莫據目前俗子
尚道朝聞道夕死可矣况我沙門日夕合履
个什麼事大須努力努力珍重

○師云汝等沒可作了見人道着祖意便問个
超佛越祖之談汝且喚那个為佛那个為祖
且說个超佛越祖底道理問个出三界你把
將三界來看有什麼見聞覺知隔碍著你有
什麼聲色可與你了了什麼梳以阿那个為

差殊之見他古聖不柰何橫身為物道个舉
體全真物物觀體不可得我向你道直下有
什麼事早是相埋沒了也實未有入頭處且
中私獨自叅詳除却著衣喫飯阿屎送尿更
有什麼事無端起得許多妄想作什麼更有
一般底恰似等閑相似聚頭學得个古人話
路識性記持妄想千度道我會佛法了也只
管說葛藤取性過時更嫌不稱意千鄉萬里
拋却老爺爺師長和尚作這般底去就這打

野狸漢有什麼死急行脚

師上堂云故知時運澆醜迨于像季近日師
僧赴去禮文殊南去遊衡嶽若恁麼行脚名
字比丘徒消信施苦哉苦哉

問著黑似漆相似只管取性過時設使有三
个两个枉學多聞記持話路到處覓相似言
語印可老宿輕忽上流作薄福業他日閻羅
王釘你之時莫道無人向汝說若是初心後
學直須著精神莫空記人說多虛不如少實

向後只是自賺有什麼事

師上堂大衆雲集師以拄杖指面前云乾坤大地微塵諸佛總在裏許爭佛法各覓勝負還有人諫得麼若無人諫得待老漢與你諫時有僧出云便請和尚諫師云這野狐精

○師云汝等傍家行脚皆是河南海北各各盡有生緣所在還自知得試出來舉看老漢與汝證明有麼有麼出來汝若不知老漢謾你去也汝欲得知若生緣在处处有趙州和尚

五臺山有文殊總在這裏若生緣在南南有雪峯卧龍西堂鼓山總在裏許汝欲得識麼向這裏識取若不見亦莫掠虛見麼見麼且看老僧騎佛殿出去了珍重

○師上堂云天親菩薩無端變作一條柳標木杖乃畫地一下云塵沙諸佛盡向這裏寫藤師下堂

師云我看你諸人二三機中不能構得空披衲衣何益汝還會麼與你注破久後諸方若

見老僧舉一指豎一拂子云是禪是道拄杖打破頭便行若不如是盡是天魔眷屬壞滅吾宗汝若不會且向葛藤社裏看我尋常向汝道微塵刹土三世諸佛西天二十八祖唐土六祖盡在拄杖頭上說法神通變化聲應十方一任縱橫你還會麼若不會且莫掠虛然雖據實實是諦見也未直饒到此田地未審夢見衲僧沙彌在三家村裏不逢一人師驀起以拄杖劃地一下云總在這裏又劃一

下云總從這裏出去也珍重

○師上堂云和尚子衲僧直須明取衲僧鼻孔且作麼生是衲僧鼻孔衆皆無對師云摩訶般若波羅密今日大普請下去

○師上堂云諸和尚子饒你道有什麼事猶是頭上著頭雪上加霜棺木裏撐眼灸瘡盤上著艾炷這个一場狼籍不是小事你合作麼生各自覓取个托生處好莫空遊州獵縣只欲擔擲閑話待老和尚口動便問禪問道向

上向下如何若何大卷抄了塞在皮袋裏卜
度到處火爐邊三五个聚頭口喃喃舉更
道這是公才語這個是從裏道出這個是就
事上道這個是體語體你屋裏老爺老娘噎
却飯了只管說夢便道我會佛法了也將知
你行脚驢年得个休歇麼更有一般底才聞
人說个休歇處便向陰界裏閉眉合眼老鼠
孔裏作活計黑山下坐鬼窟裏體當便道得
个入頭路夢見麼似這般底打殺一萬个有

什麼罪過喚作打底不遇作家至竟只是个
掠虛漢你若實有个見處試捨來看共你商
量真空不識好惡砣砣地聚頭說閑葛藤莫
教老漢見捉來勘不相當槌折脚莫道不道
你還皮下有血麼到處自受屈作麼者滅胡
種盡是野狐群隊總在這裏作麼以拄下一
時趣下

○問如何是佛法大意師曰春來草自青

○問新羅僧將什麼物過海曰草賊敗也師引

手曰汝為什麼在我手裏曰恰是師曰更踣
跳一下

○問牛頭未見四祖時如何師曰家家觀音佛
曰見後如何師曰火裏雖蠶吞大蟲

○問如何是雲門一曲師曰臘月二十五

○問如何是雪嶺泥牛吼師曰天地黑曰如何
是雲門木馬嘶師曰山河走

○問從上來事請師提綱師曰朝看東南暮看
西北曰便恁麼領會時如何師曰

東屋裏點燈西屋裏暗坐

○問十二時中如何即得不空過師曰向什麼
處着此一問曰學人不會請師舉師曰將筆
硯來僧乃取筆硯來師作一頌曰

舉不顧 即差互 擬思量 何劫悟

○問如何是學人自己師曰游山翫水曰如何
是如和尚自己曰賴得維那不在

○問一口吞盡時如何師曰我在汝肚裏曰和
尚為什麼在學人肚裏師曰還我話頭來又

○問如何道師曰去曰學人不會請師道師曰
闍梨公憑分明何得再判

○問生死到來如何排遣師展手曰
還我生死來

○問如何是父母不聽不得出家師曰淺曰學
人不會師曰深

○問如何是學人自己師曰汝怕我不知

○問萬機俱盡時如何師曰與我拈却佛殿來
共汝商量曰佛殿豈關他事師曰這謾語漢

○問如何是教化別傳一句師曰對衆問將來
曰直得恁麼時如何師曰照從何立

○問如何是和尚家風師曰門前有讀書人

○問如何是透法身句師曰北斗裏藏身

○問如何是西來意師曰久雨不晴又曰

粥飯氣

○問古人橫說豎說猶未知向上一闕楔子如
何是向上一闕楔子師曰西山東嶺青

○問如何是西來意師曰河裏失錢河裏漉

○師有時坐良久僧問何似釋迦當時師曰大衆久立快禮三拜師嘗有頌曰

雲門聳峻白雲低
水急遊魚不敢棲
入戶已知來見解
何煩再舉轆中泥

衢州南臺仁禪師

問如何是南臺境師曰不知貴曰畢竟如何師曰闍梨即今在什麼處

○師後遷住本郡鎮境寺而終
泉州東禪和尚

初開堂僧問仁王迎請法王出世如何提唱宗乘即得不謬於祖風師曰還柰得麼曰若不下水焉知有魚師曰莫閑言語

○問如何是佛法最親切處師曰過也

○問學人末後來請師最先白師曰什麼處來
○問如何是學人已分事師曰苦

○問如何是佛法大意師曰幸自可憐生剛更異鄉邑

餘杭大錢山從襲禪師

雪峯之上足也自本師印解洞曉宗要常曰
擊闌南鼓唱雪峯歌後入浙中謁錢王王欽
服道化命居此山而闡法焉

○僧問不因王請不因衆聚請師直道西來的
的意師曰那僧師僧過這邊着曰學人不會
乞師指示師曰爭得恁麼不識好惡

○問閉門造車出門合轍如何是閉門造車師
曰造車即不問汝作麼生是轍曰學人不會
乞師指示師曰巧匠施工不露斤斧

福州永泰和尚

問承聞和尚見虎是否師作虎聲僧作打勢
師曰這死漢

○問如何是天真佛師乃拊掌曰不會不會
池州和龍山壽昌院守訥號妙空禪師

福州閩縣人也姓林氏受業於古田壽峯

○問未到龍門如何湊泊師曰立到難存

○有新到僧叅師問近離什麼處曰不離方寸
師曰不易來僧亦曰不易來師與一掌

○問如何是傳底心師曰再三囑汝莫向人說
○問如何是從上宗乘師曰還向闍梨口裏着
得麼

○問省要處請師一接師曰甚是省要
建州夢筆和尚

問如何是佛師曰不誑汝曰莫便是否師曰
汝誑也

○閩王請師齋問和尚還將得筆來也無師曰
不是稽山綉管慚非月裏兔毫大王既垂顧

問山僧敢不通呈

又問如何是法王師曰不是夢筆家風
福州古田極樂元儼禪師

問如何是極樂家風師曰滿目看不盡

○問萬法本無根未審教學人承當什麼師曰
莫寐語

○問久處暗室未達其源今日上來乞師一接
師曰莫閉眼作夜好曰恁麼即優曇華坼曲
為今時向上宗風如何垂示師曰汝還識也

無曰恁麼即息疑去也師曰莫向大衆寢語
○問摩騰入漢即不問達磨來梁時如何師曰
如今豈謬曰恁麼即理出三乘華開五葉師
曰說什麼三乘五葉出去

福州芙蓉山如體禪師

僧問如何是古人曲調師良久曰聞麼曰不
聞師示一頌曰

古曲發聲雄

今時韻亦同

若教第一指

祖佛盡迷蹤

洛京憇鶴山和尚

栢谷長老來訪師曰太老去也谷曰還我不
老底來師與一摑

○問駿馬不入西秦時如何師曰向什麼處去
潭州瀉山棲禪師

問正恁麼時如何親近師曰汝擬作麼生親
近日豈無方便門師曰開元龍興大藏小藏
○問如何速疾神通師曰新衣成弊帛
○問如何是黃蘗橋師曰賺却多少人

○問不假切切如何是和尚家風師曰莫作野
牛聲

吉州潮山延宗禪師

資福和尚來謁師下禪床接資福曰和尚住
此山幾年也師曰鈍鳥棲蘆困魚止箔曰恁
麼即真道人也師曰且坐喫茶

○問如何是潮山師曰不宿屍曰如何是山中
人師曰石上種紅蓮

○問如何是和尚家風師曰切忌犯朝儀

益州普通山普明大師

問如何是佛性師曰汝無佛性曰蠢動含靈
皆有佛性學人為何却無師曰為汝向外求
○問如何是玄玄之珠師曰這個不是曰如何
是玄玄珠師曰失却也

隨州雙泉山梁家庵永禪師

問達磨九年面壁意如何師曰睡不着

○護國長老來師曰隨陽一境是男是女各申
一問問問各別長老將何祇對護國以手空

中畫一圓相師曰謝長老慈悲曰不敢低頭
不顧

○問如何得頓息諸緣去師曰雪上更加霜

漳州保福院超悟禪師 第二世住

問魚未透龍門時如何師曰養性深潭曰透
出時如何師曰才昇霄漢衆類難追曰昇後
如何師曰慈雲普護潤及大千曰還有不受
潤者無師曰有曰如何是不受潤者師曰直
杭撐太陽

太原孚上座

徧歷諸方名聞宇內嘗游浙中登徑山法會
一日於大佛殿前

有僧問上座曾到五臺否師曰曾到曰還見
文殊麼師曰見曰什麼處見師曰徑山佛殿
前見其僧後至雪峯舉似峯曰何不教伊入
嶺來

師聞乃促裝而邁初上雪峯屨院憇錫因分
甘子與僧長慶稜和尚問什麼處將來師曰

嶺外將來曰遠涉不易擔負得來師曰甘子
甘子方上

參雪峯禮拜訖立于坐右峯才顧視師便下
看主事

異日雪峯見師乃指日示之搖手而出雪峯
曰汝不肯我師曰和尚搖頭某甲擺尾什麼
處不肯和尚曰到處也須諱

却一日晚參峯在中庭卧師曰五州管內只
有這和尚較些子峯便起去

峯嘗問師曰見說臨濟有三句是否師曰是
作麼生是第一句師舉目視之峯曰此猶是
第二句如何是第一句師叉手而退自此雪
峯深器之

室中印解師資道成師更不他遊而掌浴室
○一日玄沙上問訊雪峯曰此間有个老鼠干
今在浴室裏玄沙曰待與和尚勘破言訖到
浴室遇師打水玄沙曰相看上座師曰已相
見了玄沙曰什麼劫中曾相見師曰瞌睡作

磨玄沙却入方丈白雪峯曰已勘破了峯曰
作麼生勘伊玄沙舉前語峯曰汝著賊也

○鼓山晏和尚問師父母未生時鼻孔在什麼
處師曰老兄先道晏曰如今生也汝道在什
麼處師不肯晏却問作麼生師曰將手中扇
子來晏與扇子再徵之師默置晏因測乃歐
之一拳

○師在庫立有僧問如何是觸目菩提師踢狗
子作聲走僧無對師曰小狗子不消一踢

○師未出世諸方目為太原孚上座終于維揚
南嶽般舟道場寶聞大師

惟勁福州人也素持苦行不衣繒纊惟壞衲
以度寒暑時謂頭陀焉

○初叅雪峰深入淵奧復問法玄沙之席心印
符會一日

○謂鑒上座曰聞汝注楞嚴經鑒曰不敢師曰
三文殊汝作麼生注曰請師鑒師揚袂而去

○唐光化中入南岳住報慈東藏亦號三生藏